

omnium dimensionibus minoribus, pubescentia densiore, segmentorum folii forma aliena, phyllis involucri longiore mucronatis recedit.

**2. *Leontodon jailae* Klok. species nova.**

Rhizoma abbreviatum, brunneum, crassum. Tota planta laete viridis. Caules scapiformes 1—4, assurgentes, ca. 10—25 cm alti, simplices calathidio apicali unico, pilis rigidis inaequalibus apice 2—4-fidis, saepissime bifidis, densiuscule obtecti, foliis omnino destitui. Folia radicalia rosulantia, dentata vel pinnatim incisa, ambitu oblongo-obovata vel saepius oblanceolata, ca. 3—12 cm longa, 0,5—2 cm lata, basin versus in petiolum obsoletum attenuata, apice obtusa (externa in rosula) vel acutata, pilis 2—3-fidis, subtus densioribus et longioribus (usque ad 1,2 mm longis) obtecti; dentes vel lobi foliorum saepissime deflexi. Calathidia floribuscum ca. 17—24 mm longa; involucrium 11—14 mm longum; phylla ei lineari-lanceolata, atriuscule virentia, dorso pilis apice bifidis inaequalibus simplicibus subundulatis 1—2,5 mm longis immixtis pubescentia; flosculi involucri 1,5-plo longiores, ligulae eorum flavae denticulis apice brunnescenti-cinnamomeis. Achenia fusiformia ca. 6 mm longa, 0,8—0,9 mm diametro, cinnamomea, longitudinaliter striatella, transversim rugulosa, apice scabrida; pappus ca. 8 mm longus, albidus.

Floret VII. Habitat in declivibus calcareis montanis tauricis.

Typus. RSS Ucr., ditio Taurica, districtus Alushtensis, mons Roman-Kosh, 16. VII 1955, A. I. Gisenko.

Affinitas. A proximo *L. biscutellifolio* DC. foliis minus dense pilis 2—3-, non 3—4-fidis, mollioribus, phyllis involucri pilis solum bifidis simplicibus immixtis, nunquam 2—5-fidis, obtectis, ligulis flosculorum flavis, extus haud rubescentibus, acheniis brevioribus et crassioribus erostratis, pappo brevioris valde abhorret.

**3. Generis *Tragopogon* L. series *Pseudorientales* Klok. nova. — *Tragopogon orientalis* auct., non L.**

Calathidia haud numerosa, interdum singularia. Pedunculi sub calathidio saepissime paulum incrassati, involucrium octophyllum vel interdum decaphyllum, 2—4,5 cm longum; flosculi flavi necnon aurantiaci, marginales involucri sublongiores vel manifeste longiores. Antherarum tubulus saepissime nigricans. Achenia rostrata elongata. Herbae biennes glabrae vel glabriusculae.

Typus seriei: *Tragopogon melanantherus* Klok. Ad seriem hanc species praticolae eurasiaticae adhuc indescriptae et cum *T. orientali* L. confusae pertinent.

*T. orientalis* L. ex diagnose autentico «differt a *T. pratensi* Flore majore, Calyce, ubi reflectitur quasi fracto; Radio Corollae subtus luteo, nec fusco striato; Antheris luteis, nec fuscis»; secus Willdenovium species haec «habitat in Oriente, Astracan». *T. pratensis* L. septentrionali-europaeum a nostris achenio brevius rostrato recedit.

**4. *Tragopogon moldavicus* Klok. species nova. — Series *Pseudorientales* Klok.**

Caules erecti 25—65(90) *cm* alti, glabri, simplices vel saepius paulum ramificati, in parte inferiore foliosi. Folia radicalia necnon caulina inferiora linearia vel lineari-lanceolata ca. 10—25 *cm* longa, 3—14 *mm* lata, acutata, margine saepe undulatissima et apice contorta vel subundulata et apice erecta, glabra vel subtus parcissime flocculosa, saepissime conduplicata; folia superiora oblongo-lanceolata vel e basi oblongo-ovata in apicem linearem acuminatum, saepe contortum attenuata, 3—10 *cm* longa, 5—13 *mm* (basi) lata, subtus parce arachnoidea. Calathidia 1—5, pedunculi sub calathidio 1,5—4 *mm* diametro, haud raro subinflati et arachnoidei; involucrium (20) 25—38 *mm* longum, (5) 6—12 *mm* basi diametro; phylla involucri 8, raro 10, lineari- vel oblongo-lanceolata, 3—5 *mm* lata, basi manifeste, apice parcissime arachnoidea, tenuiter acuminata; flosculi marginales involucri praestantes, ligulae eorum 18—25 *mm* longae, flavae vel atriflavae nervis 4 cinnamomescentibus; antherarum tubulus 4,5—5 *mm* longus, atriflavus striis cinnamomescentibus. Achenia fusiformia 14—18 *mm* cum rostro longa, 1—1,5 *mm* diametro, apice in rostrum achenio ipso subbrevis attenuata; pappus 10—21 *mm* longus, flavescens-albidus, sublucidus; achenia marginalia basi laevia, supra praesertim in costulis squamulis minutis obsita; mediana sublaevia vel laevissima, marginalibus longiora, rostro etiam longiore.

Floret VI—VII. Habitat in declivibus steppeis vel ad margines silvarum in Moldavia necnon Ucraina occidentali.

Typus. RSS Mold., districtus Kalarashiensis, pag. Bachmut, in vineo, 8. VI 1951, Serdul. Kioviae conservatur.

5. *Tragopogon transcarpaticus* Klok. species nova. — Series *Pseudo-orientales* Klok.

Caules erecti 30—80 *cm* alti, sicut et tota planta glaberrimi, pauciramosi, ramis abbreviatis haud numerosis vel elongatis floriferis 1—3. Folia radicalia necnon caulina inferiora taeniiformia ca. 20—30 *cm* longa, 2,5—12 *mm* lata, acuminata, margine saepe undulatissima, saepissime conduplicata, vulgo numerosa et congesta; folia superiora basi dilatata oblongo-ovata, apice linearia, acuminata, saepissime deflexa, vulgo spiraliter contorta et margine undulata, ca. 4—9 *cm* longa, 4—12 *mm* (basi) lata. Calathidia 2—6, pedunculi sub calathidio 2—5 *mm* diametro, saepe subinflati; involucrium 23—38 *mm* longum et 7—9 *mm* basi diametro sub anthesin, fructiferum usque ad 45 *mm* longum et 15 *mm* diametro; involucri phylla lineari- vel oblongo-lanceolata, 3—8,5 *mm* lata, sat tenuiter acuminata; flosculi marginales involucri praestantes, ligulae eorum 18—23 *mm* longae, ca. 4 *mm* latae, flavae necnon laete aurantiacae, saepe striis 4 cinnamomeis ornatae; antherarum tubulus ca. 5—5,5 *mm* longus, in triente inferiore flavus, supra striis 5 nigrescenti-violaceis atratus. Achenia fusiformia, 16—24 *mm* cum rostro longa, 1—1,4 *mm* diametro, subpentagona, in costulis squamulis minutis obsita, apice in rostrum achenio ipso aequale vel manifeste longius attenuata; pappus 12—24 *mm* longus, fumaceus.

Floret VI—VII. Habitat in pratis montanis carpaticis.